



FM 2015/120, 121 og 122
14. april 2014
Aaja Ch. Larsen

120:

Aningaasaateqarfimmi aningaasat katersat ileqqaakkallu erniaat taamaallaat atorreqarsinnaaneri siunertaralugu Aatsitassarsiornermi Aningaasaateqarfik pillugu Inatsisartut inatsisaannut nr. 6, 5. december 2008-meersumut allannguutissamik saqqummiussinissaannik Naalackersuisut peqquneqarnissaannut Inatsisartut aalajangiiffigisassaattut siunnersuut.

121:

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut Naalackersuisut peqquneqarnissaannut Inatsisartut aalajangiiffigisassaattut siunnersuut, imaalillugu Inatsisartut ukiut tulleriissut aappassaanni nunatta karsiata naatsorsuutaanik aatsaat akuersereeraangata aningaasaateqarfik aallartinneqartassasoq, aatsaallu ukiumi naatsorsuiffiusumi aatsitassanit isertitat 10 millioner kroninit annertunerusimappata. Inatsisartut inatsisaat ukiup tullissaani 1. januarimi atuutilissaaq imaluunniit Naalackersuisut aalajangiippata siusinnerusukkut. 10 millioner kronit taaneqartut Inatsisartut ukiumi pineqartumi Aningaasaqarnermut inatsisaat naapertorlugu ataatsimut isigalugu akit akissarsiallu nalingannut naleqquassarneqartassapput.

122:

Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaata nr. 6, 5. december 2008-meersup allanngortinneqarnissaanut kingusinnerpaamik UPA2016-imi Naalackersuisut peqquneqarnissaannut Inatsisartut aalajangiiffigisassaattut siunnersuut, imaalillugu Kalaallit Nunaata Aatsitassarsiornermi Aningaasaateqarfia pillugu Inatsisartut inatsisaanni aatsitassarsiornermit isertitanut paasinninnera Namminersoneq pillugu inatsimmi aatsitassarsiornermit isertitanut paasinninnermit immikkoortinneqassasoq. Allanguinermi tigussaasumik atortut, soorlu oliamik maqisuunnginnissamat atortut, illuutit sanaartukkalluunniit allat atortullu Kalaallit Nunaata Aatsitassarsiornermi Aningaasaateqarfiani aatsitassarsiornermit isertitatut naatsorsuutigineqannginnissaat allanneqartariaqarpoq.

(Inatsisartunut ilaasortaq Naaja H. Nathanielsen, Inuit Ataqatigiit)

Pisag manna aatsaat Inatsisartuni eqqartorneqalinngilaq. Allaammi ukiorpaalunngortuni oqaluserineqartarsimavoq, siunnersuutitut, Aningaasaqarnermut Siunnersuisoqatigiit nalunaarutaasigut § 37-lu naapertorlugu apeqquteqarnikkut. Taamaattumik ukiut ingerlaneranni partiit arlaliullutik tapersersuisuunerat tusartarsimavarput, partiit allat nalornisuunerusartut. Aamma allannguutissatut siunnersuutit arlaliusut oqallisigineqartarsimapput. Ajoraluartumillu qinersinissamik nalunaarutiginnittarnerit pissutigalugit siunnersuutit oqallisigineqarneri naammassineqartarsimangillat.

Kingullermik siunnersuutit saqqummiunneqarmata ataatsimiititaliamit suliarineqarnissaannut ingerlateqqinneqarsimapput. Nalunngilarput siornatigut

annertuunik piareersaateqartoqartasimasoq, taamaattumillu ataatsimiititaliamit naammassillugu suliarineqarnissaa utaqqimaarparput. Inuit Ataqtigiinniit suliap matuma naammassineqartariaqalerneranut piffissanngorsoraarput.

Imm. 120 partiinit tamanit tapersorsorneqanngitsoq ilisimavarput. Taamaattorli ataatsimiititaliamit suliarineqartussatut ingerlateqqinneqarnissaanut neriuteqarpugut. Siunnersuummi Aatsitassarsiornermi Aningaasaateqarfiup aningaasaataasa illersorneqarnissaat anguniarneqarpoq, tassa kingulissatta – meeqqatta ernuttattalu – ullutsinni aatsitassarsiornermit isertitassanit iluaquserneqarnissaat eqqarsaatigalugu. Pisuussutit qallorneqareernerminni pinngooqqissinnaaneq ajorput – taamaattumillu eqqarsaqqissaartumik aningaasat atorneqarnissaannut akisussaaffeqarpugut. Imm. 120-mi siunnersuut taamak isikkoqartilluni tapersorsorneqanngippat ataatsimiititaliami naaperiarfigineqarsinnaasumik allannguutissamik siunnersuuteqartoqarnissaanik kissaateqarpugut. Tamanna soorunami suliamut tassunga ilanngunneqassaaq.

Imm. 121 siunnersuutaavoq siornatigut saqqummiunneqareersimasoq. Siunnersuullu Inatsisartut tamarmiullutik isumaqtigiinnerannit aallaaveqarpoq. Taamaattorli qinersinissamik nalunaaruteqartoqarmat naammassineqanngitsoorsimavoq. Neriuppugut Inatsisartut pisami eqqarsaatersuutigisimasaat pitsaasumik tiguneqarumaartut.

Imm. 122 siunnersuutaavoq teknikkitaqangaatsiartoq, taamaattorli aatsitassarsiornermi aningaasaateqarfiup atuunnissaanut apeqqutaangaatsiartoq. Siunnersuut maanna Aningaasaqarnermut Naalakkersuisumit siornatigut alaatsinaanneqarluarsimasuuvoq. Taamaakkaluartorli siunnersuutip itigartinneqarnissaa Naalakkersuisuniit inassutigineqarpoq. Taamaakkaluartoq Inuit Ataqtigiinniit siunnersuutip ataatsimiititaliamit suliarineqarnissaminut ingerlateqqinneqarnissaa neriuteqarput, tassanimi allannguutissatut siunnersuuteqarnissamut periarfissat misissorneqarsinnaapput.

Inuit Ataqtigiinniit ukiami ataatsimiinnissamut Naalakkersuisut aatsitassarsiornermi aningaasaateqarfimmut siunnersuuteqarniarlersaarnerat maluginiarparput. Taamaattumik Inuit Ataqtigiinniit siunnersuutit tamakkerlutik ataatsimiititaliamit suliarineqartussatut ingerlateqqinneqarnissaat siunnersuutigerusupparput, tassa ataatsimiititaliap taakkua ataatsimoortillugit naammaginartumik siunnersuuteqarnissaa, inerniliinissamilu periarfissanut Naalakkersuisut suleqatiginissaat inassutigalugutigu.

Siunnersuutit "kikkut pigineraat" pingaarnerunngilaq, pingaarnerli tassaavoq attanneqarsinnaasunik inerniliinissarput sapinngisamillu partiit amerlanerpaat tapersersuisuunissaat.

Taamatut oqaaseqarluta siunnersuutip aappassaaneerneqannginnermini aatsitassanut ataatsimiititaliamut ingerlatinneqarnissaa kissaatigissavarput.